

佛說睽子經

乞伏秦三藏法師釋聖堅譯

聞如是一時佛在毗羅勒國與千二百五十比丘及衆菩薩國王大臣長者居士清信士女不可稱計一時來會佛告諸比丘皆悉寂靜定意聽我念前世初得菩薩道時戒行普慈精進一心修集智慧善權方便功德累積不可稱記諸天龍鬼神帝王人民無能行者阿難聞佛言更正衣服長跪叉手白佛言願欲所聞佛告阿難乃往過去無數世時有菩薩名曰一切妙行慈仁惠施救濟群生常行四等心度世危難育養苦人在兜率天上教授天人常以晝夜各三時定意思惟三界照觀十方天下人民善惡之道知有父子相養父母奉事三尊恭順師長修諸功德者常以天眼遍觀五道時有迦夷國中有一長者孤無兒子夫婦兩目皆盲心願入山求無上慧修清淨志信樂空閑菩薩念言此人發意欲學妙道而兩目皆盲目無所覩若入山中或墮溝坑或逢毒虫所見危害若我壽終爲其作子供養父母終其壽即便往生盲父母家爲其作

子父母歡喜愛之甚重布發道意欲行入山以生子故便樂世間子年十歲名曰睽子至孝仁慈奉行十善不殺不盜不姪不欺不飲酒不妄言不綺語不嫉妬信道不疑晝夜精進奉事父母如人事天言常含笑不傷人意行則應法不望傾邪於是父母即大喜悅無復憂愁睽年過十歲睽自長跪白父母言本發大意欲入深山志求空寂無上之道豈以子故而絕本願人居世間無常百變命非金石對至無期願如本意宜本先志自隨父母俱共入山侍養之宜不失時節父母報睽子言孝順天自知之不違本誓便當入山睽即以家中所有之物皆施國中諸貧窮者便與父母俱共入山睽子至山中以柴草爲父母作屋施置牀褥不寒不熱恒得其宜適入山一年衆果豐美食之香甘泉水涌出清而且涼池中蓮華五色精明梅檀雜香樹木豐茂香倍於常風雨以時不寒不熱樹葉相接以障雨露蔭覆日光其下常涼飛鳥翔集皆作伎樂之音以娛樂盲父母師子熊羆虎狼毒獸皆自慈心相向無驚害之心皆飲水啖果無復驚怖之心麋鹿衆鳥皆來附近與睽音聲相和以娛樂盲父母睽至孝仁慈無有過却地常恐地痛天神山神皆作人形晝夜慰

勞三道人一心定意無復憂愁睽常與父母取百種果蓏以食父母父母時渴欲飲睽者鹿皮衣提瓶行取水麋鹿飛鳥亦復往飲不相畏難時迦夷國王入山射獵王見水邊有麋鹿飛鳥引弓射之箭誤中睽睽被毒箭甚痛便大呼言誰持一毒箭射殺三道人王聞人聲下馬往到睽前睽謂王言象坐牙死犀坐角死羣坐毛死麋鹿坐皮死今我死無牙無角無皮肉不可噉今有何罪橫見射煞王言卿是何人被鹿皮之衣與禽獸無異睽言我是王國中與盲父母俱來學道二十餘年未曾爲虎狼毒虫所害今便爲王箭所射殺之當尔之時山中大風暴起吹折樹木飛鳥禽獸師子熊羆虎狼毒獸皆嗥呼動一山中日無精光涼泉爲竭衆花萎死雷電動地時盲父母即自驚起曰是何變異睽行取水經久不還將無爲毒虫之所害耶禽獸悲鳴音聲號呼不如常時風起四面樹木摧折必有災異王時怖懼大自悔責我本射鹿箭誤傷中射殺道人其罪甚重坐貪少肉而受重殃我今以一國財寶宮殿妓女丘郭城邑以救子命時王便前以手拔睽臂箭箭深不可得出飛鳥禽獸四面雲集悲鳴呼喚動一山中王益怖懷文節皆動睽言非王之過我

自宿罪所致我不惜身命但憐我盲父母年既衰老目無所見一旦無我亦當終歿以此懊惱酷毒耳當介之時諸天龍神皆爲肅動王便重言我寧入泥犁中百劫受罪使睽身活長跪向睽悔過若睽命終我當不復還國便住山中供養卿盲父母如卿在時勿得爲念天龍鬼神皆當證知我不負此誓睽聞王此誓雖被毒箭心喜意悅雖死不恨以我父母累王供養王當罪滅得福無量王言卿語我父母處及子未絕吾欲知之睽即指示從此步徑去是不遠自當見草屋父母在其中止王徐徐往勿令我父母驚動怖懷以善方便解語其意王當爲我上白父母我無常今至當就後世我不惜身命但憐我盲父母年以衰老目無所見一旦無我無所依仰以此懊惱自酷毒耳我死自分宿罪所致無可得脫今自懺悔從無數劫有身以來所行衆惡於此罪滅願與父母世世相值不相遠離當令父母終係年壽勿有憂患天龍鬼神常隨護助災害消滅所欲應意無爲自然王將數人詣父母所王去之後睽奄死矣百鳥禽獸四面雲集皆大號呼遠睽尸上舐是胾血盲父母聞此音聲益怖彷徨而行王行使疾觸動草木肅肅有聲父母驚言此是何人非我

子行王言我是迦夷國王聞盲道人在山學道故來供養盲父母言枉屈大王來相慰勞遠臨草野王當疲極體安隱不宮殿夫人太子官屬皆安善不風雨和調五穀豐不隣國人民不相侵害耶王荅道人得蒙尊恩常自平安又更問訊在此山中勞大勤苦樹木之間甚難爲止自安隱不盲父母言蒙大王恩常自安隱我有孝子名字曰睽常取果蔬泉水無乏我有草蓆王可就坐果蔬可食睽行取水正介來還王聞盲父母言又大傷心弟泣其言我罪實重入山射獵遙見水邊有諸群鹿引弓射之箭誤中睽道人子睽已被毒箭其痛甚酷今故自來語道人耳父母聞之舉身自撲如太山崩地爲大動號哭仰天自陳訴言我子睽者天下至孝無有能過蹈地常恐地痛有何罪故而射煞之向者大風卒起吹折樹木百鳥悲鳴皆大號呼動一山中我在山中二十餘年未曾有此災異之變而我子睽取水不還恐當有故諸神皆驚肅肅而動母便涕哭不肯復止父言且止人生世間無有不死無常對至不可得却但問王睽爲射何許今爲死活王以睽語向父母說其盲父母聞王此語又大感絕一旦無子俱亦當死大王今者牽我二人往子尸上王即牽

盲父母往到尸上父抱其頭母抱兩脚著與膝上各以兩手捫摸睽箭仰天呼言諸天龍神山神樹神我子睽者天下至孝是諸天龍神所知我年已老目無所見身代子死睽活不恨於是父母俱共誓言若睽至孝天地所知箭當拔出毒痛當除睽應更生

於是第二忉利天帝座即爲動以眼見此二盲道人抱子號呼乃聞第四兜率天上釋梵四王從天上來如人屈伸之頃來住睽前以神妙藥灌睽口中藥入睽口箭拔毒出更生如故父母聞睽以死已生兩目皆開飛鳥走獸皆大歡樂之音風息雲消日爲重光涼泉涌出清而且涼池中蓮華五色精明栴檀雜香樹木光榮香倍於常時王歡喜不能自勝禮天帝釋還禮父母及子睽者願以一國所有財寶俱上道人自相供養令我罪滅永無有餘睽語王言欲興福者王但還國安慰人民當令奉戒王勿射獵橫殺無辜身不安隱壽終當入泥犁之中人居世間恩愛暫有別離長久不得常在王宿有福今得爲王莫憍自在以自在故造無量惡後入惡道悔之何益王荅如教隨王獵者見睽死已得天神藥死而更生父母眼開神變如是悉奉五戒修行十善死得生天無入惡道

佛告阿難諸來會者宿命昧者吾身是也盲父者闍頭檀王是盲母者今王夫人摩耶是也迦夷國王者阿難是天帝釋者弥勒佛是佛告阿難吾前世爲子仁孝爲君慈育爲民奉敬自致得成爲三界尊佛說經已時諸菩薩比丘比丘尼優婆塞優婆夷莫不歡喜作禮而去

佛說睽子經

佛說睽子經

校勘記

- 一 底本，宋資福藏本。
- 一 校本，磧、晉、南、徑、清。
- 一 二二頁上二行譯者，「乞伏秦」，晉、南、徑、清作「姚秦」。
- 一 二二頁上五行「悉寂靜」，晉、南、徑、清作「處」。
- 一 二二頁上六行第四字「念」，晉、南、徑、清無。
- 一 二二頁上六行第一六字「慈」，晉、

- 南、徑、清作「具」。
- 一 二二頁上八行首字「記」，晉、南、徑、清作「計」。
- 一 二二頁上一三行第一二字「界」，晉、南、徑、清作「昧」。
- 一 二二頁上一四行「相養」，南、徑、清作「孝順」。
- 一 二二頁上一七行第一三字「慧」，晉、南、徑、清作「道決」。
- 一 二二頁上二一行第五字「壽」，晉、南、徑、清作「年壽於是菩薩壽盡」。
- 一 二二頁上二一行第八字「往」，晉、南、徑、清作「下」。
- 一 二二頁中一行第一〇字「布」，晉、南、徑、清作「本」。
- 一 二二頁中二行第八字「聞」，磧、晉、南、徑、清作「間」。
- 一 二二頁中五行第八字「事」，磧、晉作「奉」。
- 一 二二頁中六行第八字「邪」，南、徑、清作「斜」。
- 一 二二頁中七行第四字「睽」，徑、清

- 作「至」。
- 一 二二頁中一一行「子言」，徑、清作「言子之」。
- 一 二二頁中一四行第一三字「柴」，徑、清作「蒲」。
- 一 二二頁下八行「無牙」，南無。
- 一 二二頁下九行第二字「角」，南、徑、清作「角無毛」。
- 一 二二頁下一〇行第七字「被」，磧作「披」。
- 一 二二頁下一四行第一四字「嗒」，南作「嗒」；徑、清作「號」。
- 一 二三頁上二三行第一四字「行」，徑、清作「住」。
- 一 二三頁中一〇行末字「弟」，磧、晉、南、徑、清作「涕」。
- 一 二三頁中二〇行第四字「便」，晉、南作「使」。
- 一 二三頁下一行末字「與」，徑、清無。
- 一 二三頁下一一行第八字「已」，晉、徑、清作「更」。